



KEMENTERIAN KESIHATAN MALAYSIA

## KENYATAAN MEDIA KEMENTERIAN KESIHATAN MALAYSIA

### PENUBUHAN PASUKAN PETUGAS KHAS BAGI MENYIASAT KES INSIDEN KEMATIAN PAKAR PERUBATAN PATOLOGI DI LAHAD DATU, SABAH

---

1. Kementerian Kesihatan Malaysia (KKM) berpendirian tegas dan tidak bertolak ansur dengan perlakuan buli di tempat kerja. Selaras dengan pendirian tersebut, KKM dengan ini memaklumkan penubuhan satu pasukan petugas khas bebas yang dinamakan Pasukan Petugas Khas Bagi Menyiasat Insiden Kes Kematian Pakar Perubatan Patologi di Lahad Datu berkuat kuasa 10 Oktober 2024.
2. Pasukan Petugas Khas ini akan dipengerusikan oleh **YBhg. Tan Sri Borhan bin Dollah**, yang berpengalaman menyandang pelbagai jawatan utama dalam perkhidmatan awam, dengan jawatan terakhir sebagai Ketua Pengarah Perkhidmatan Awam.
3. Selain itu, Pasukan Petugas Khas juga dianggotai oleh lima (5) ahli bebas bukan anggota KKM yang berpengetahuan dan mempunyai kepakaran dalam seperti bidang perubatan, psikiatri, patologi serta kesihatan mental dan perlakuan buli iaitu:

(a) **YBhg. Profesor Datuk Ir. Ts. Dr. Siti Hamisah binti Tapsir**

Merupakan mantan Ketua Setiausaha Kementerian Sains, Teknologi dan Inovasi (MOSTI). Beliau juga pernah memegang jawatan Ketua Pengarah Pendidikan Tinggi dari tahun 2017 hingga 2019 dan kini menjawat jawatan Naib Canselor UCSI dan Ketua Pegawai Eksekutif UCSI selepas 33 tahun berkhidmat sebagai penjawat awam.

(b) **YBhg. Dato' Dr. Haji Azman bin Abu Bakar**

Merupakan mantan Timbalan Ketua Pengarah Kesihatan (Perubatan) dan telah berkhidmat dengan KKM selama 35 tahun. Beliau juga pernah menjadi Pakar Perunding, Pertubuhan Kesihatan Sedunia (WHO) bagi skop penyelidikan sistem kesihatan dan kualiti perkhidmatan kesihatan. Kini, beliau merupakan Ahli Suruhanjaya Perkhidmatan Awam (SPA).

(c) **YBhg. Dato' Mohamad Fazin bin Mahmud**

Merupakan pesara perkhidmatan awam dalam profesion Pegawai Kehakiman dan Penasihat Undang-Undang di pelbagai kementerian. Beliau pernah menjadi Penasihat Undang-Undang KKM. Kini, beliau merupakan Ahli Lembaga Pihak Berkuasa Peranti Perubatan.

(d) **YBhg. Datuk Prof. Ulung Dr. Looi Lai Meng**

Merupakan Profesor Ulung pertama di Malaysia dalam bidang Patologi dan kini menyandang jawatan sebagai Perunding Kanan di Pusat Perubatan Universiti Malaya (PPUM). Beliau adalah seorang Pakar Patologi yang berprestij di dunia dengan pengkhususan dalam Patologi Global, Teknologi Inovatif, dan Kanser. Pada tahun 2022, beliau telah dinobatkan sebagai salah seorang *World Top 2% Scientists*.

(e) **YBhg. Profesor Dr. Chan Lai Fong**

Merupakan Profesor dan Pakar Perunding Kanan (Psikiatri) di Jabatan Psikiatri, Fakulti Perubatan, Universiti Kebangsaan Malaysia sejak 2024. Beliau memiliki kepakaran dalam bidang pencegahan bunuh diri dan merupakan wakil Malaysia dalam *International Association of Suicide Prevention* (IASP) sejak 2018, serta kini dilantik sebagai Naib Presiden ke-3 (*3rd Vice-President*) IASP dari 2021-2026. Kepakaran beliau dalam bidang pencegahan bunuh diri telah mendapat pengiktirafan peringkat antarabangsa.

4. Pasukan Petugas Khas ini berperanan untuk:

- (a) melaksanakan siasatan dan menganalisis input daripada siasatan insiden kematian Pakar Patologi Kimia di Lahad Datu secara khusus serta meneliti budaya kerja di Hospital Lahad Datu;
- (b) mengenal pasti dan mengesahkan sama ada wujud perlakuan buli di Hospital Lahad Datu secara umum dan di Jabatan Patologi Hospital Lahad Datu secara khusus;
- (c) mengenal pasti jenis perlakuan buli yang cenderung berlaku di KKM serta faktor dalaman dan luaran yang menyumbang kepada perlakuan tersebut; dan
- (d) menyediakan laporan hasil siasatan berkaitan insiden kematian Pakar Perubatan Patologi Kimia di Lahad Datu serta cadangan penambahbaikan bagi mencegah dan menangani perlakuan buli di fasiliti kesihatan dalam masa tiga (3) bulan dari tarikh penubuhan.

5. Turut ditekankan sekali lagi bahawa KKM komited untuk memperbaiki persekitaran kerja supaya lebih harmoni dan kondusif. KKM yakin usaha ini akan membuahkan hasil dan mendapat kerjasama daripada semua warga KKM selaras dengan visi untuk menyediakan perkhidmatan kesihatan terbaik untuk Malaysia MADANI.

**DATUK SERI DR. DZULKEFLY AHMAD**

**MENTERI KESIHATAN**

**2 OKTOBER 2024**